

COMUNICATO n. 2491 del 13/09/2025

Manà fora su Trentino Tv l program l vegn endrezà dal Comun General de Fascia

“Pedies”: per en sabeda ai 13 de setember vegn fora la puntata #503 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 503.

I argomenc che porton dant te Pedies de chesta setemèna l é:

L scomenz del nef an de scola, peà via enstadì. N dat che fèsc cruzièr l é segur chel del smendrament di scoles enscinué te la Scola Ladina de Fascia. Del 2019 i era 1250 ades enveze i é en dut 1038. N trend chest che no l vèl demò per la Scola Ladina de Fascia ma per duc i paijes ozidentèi. Aon domanà donca al Sorastant de la Scola Ladina Federico Corradini che comporta chest smendrament e coche l é peà via chest an de scola.

Fascia Balon. Aon intervistà l president Pier Paolo Trottnner che l ne à contà de coche la pruma squadra del Fascia Balon la se à endrezà per chest nef campionat tanche pontà via. Rejonaron ence de l’ativitèdes che la sociazion met a jir per i più joegn, dai 6 egn en su.

Polins de Sèn Jan. Sion jic do a sentir coche i se à endrezà i Polins de Sèn Jan do che l Comun l se à tout fora da la Convenzion de Val. Aon rejonà del gran tegnir che i cogn controlèr e ence del problem di camper che da n trat en ca te Val i à scomenzà a esser dassen massa.

Tel ultim report rejonaron de Marcialonga Running. Più che 1500 i é stac i atlec al via de la 23eisema Marcialonga Running Coop. Da Moena i se à dat endesfida fora per Fiem, chi co la garejèda curta de 21 kilometres, con travert a Masi e chi coi 26 kilometres per ruèr a Ciavaleis. Davide Stoffie, diretor Marcialonga, l se à dit content de la garejèdes de chest an, semper con n bon numer de enscinué e con n endrez che à semper garatà. L apuntament che vegn l é per de jené, per la 53 eisema Marcialonga.

I reports de chesta setemèna, enjigné da Riccardo Zanoner e Angela Pederiva i vegn porté dant co la ousc de Sabrina Riz.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenia da les 13.30 (mesa la does domesdì) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina.

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(us)